

Fida Nyamesemka: Ɔbese 24, 2014.

(Friday sermon –24<sup>th</sup> October 2014 – Fante Translation)

Fa kese a ntsease ahye mu ma na nsem ahorow wo mu a woyii kyere wo Kur'an Kronkron mu no woyii onam Abu Jahal a na owɔ ho ntsi. Se nka nkorɔfo bi tse de Abu Jahal nnyi wiadze a nka onnye adze a Kur'an Kronkron a woakyere mu dem yi ho behia.

Ne dem ntsi Kur'an Kronkron no ye Nyankopon N'asem. Ber a wɔrekasa tsia no pii no dem ara so na ne nsunsuando nye de n'ahoofew no beda edzi. Ne dem ntsi suro de se noho kasatsia no ye pii a, wobesi dan eyi ano no ye bonsam ekyingye. Nyankopon N'asem na obegyina na woabo hen gyedzi ho ban anaa oye hen ara hen asodzi de yebɛbo Nyankopon N'asem noho ban? Dem akyeresem a ohia nyimpa ne banbo no, ye nkontompo kyerewsem na ose fata na wobeyi no tokyen na noho nnyi mfaso mma hen. Dem Kur'an Kronkron no noho wo mfaso dze ma hen a onnhia nyimpa biara de obobo ho ban naaso osipi de ne banbofo nye Nyankopon Nara na asem biara a wobeka etsia no biara no, owɔ de oyi ano, nara (Kur'an Kronkron no) na owɔ de nara da ne keseye nye n'enyimnyam edzi. Hen Kur'an Kronkron no tse dem yi pepɛɛɛ.

Ekyir no ɔrekasa afa kwan a obi befa do eyi ne mberewye efi ho no ɔkaa de iyi ye asem a ofi Anohoba Mesia (ANN) nara n'abrabo mu. Dakor wo Lahore kwan mu no obi pem Anohoba Mesia (ANN) ara ma oboo famu. Nkorɔfo a onye hon nam no hun dem no hon bo fuwee ara ma na biribiara da no edzi de wobotu ahye nyimpa oye dem nodo, naaso Anohoba Mesia (ANN) no kaa de oye iyi wo ahoozen tsebea mu wo nokwar ngyina do mu. Mma hom nka hwee nkyere no. Ntsi ɔda no edzi de Nyankopon N'akomhyefo no nnkasa onam hon ara hon hia ntsi. Na mbom wokasa mbrɛ obeye a wobekasa ama Nyankopon N'enyimnyam nye Ne Kesyee. Ne dem ntsi mma hen dwen de Nyankopon N'akomhyefo no bo hon bra de dza ankorankora bo no. Nsonsonɛ kese da Nyankopon N'akomhyefo hon ndzeyee na nkorɔfo gyan hon ndzeyee ntamu. Woye ndzeyee dze ma Nyankopon na nkorɔfo gyan no ye ndzeyee dze ma hon ara hon ho.

Ekyir no ose na Anohoba Mesia (ANN) taa ka Hazrat Muawia (NN) ne mpae ho asem, de dakor Fajr asɔr paa noho wo ne mber do onam mfom ntsi, onnye adze a ɔbreɛ no adze, daabi, nokwar no nye de ɔkor sor kor gyinabew afofor do. Ne dem ntsi obi a noho aba noho do de woaye bon nye obi a onya mpuntu na se obi noho aba noho do de woaye bon a, ono dem nyimpa kor no dze noho wura bonye mu. Ne dem ntsi no gyedzinyi wo de ɔdwendwen dem mpaebɔ yi ho, 'kyere hen kwan tseneenee no,' na owɔ de ɔtse ase de onnya sumabew mmfir amandzeho nyinara ho. Obenya sumabew ber a ɔtse Nyankopon ne ndze de ɔreka iyi akyerɛ no. Ne dem ntsi owɔ de mber nyinara no nyimpa susu ne mberewye gyinabew. Nyimpa a ɔtse dem no de woebue sunsum mu mpuntu abobow no ama no na obi a onnyi iyi no nye nyia a wɔatow sunsum mu abobow no mu ama no na nyimpa a ɔtse dem no ye obi a woedzi nkugu.

Wotsia Jama'at yi, wotsia Akomhyefo na na ntsia yi ye akwanya dze mpuntu na nkodo. Woakyere de yetsia asem yi fi Anohoba Mesia (ANN) no ho mpen pii. Na ɔtaa ka de atamfo no beka kasafi akyerɛ hen na wobeyeyaa hen na wobetsia hen, yedze hye hen mu de nhyira nkra a wɔwo hon mu no beba hen ho, naaso se nkorɔfo nnyeyaa hen anaa wonntsia hen na woye dzenn koraa a, ono iyi beye akwanya dze ma hen de yedzi yaw.

Na Anohoba Mesia (ANN) no taa ka de Nkomhyenyi ne tsebea tseɛ aberwa bi a na wonyim fa noho de n'adwen nnhyedaa nnye edwuma na mbofra a wɔwo kurowkese no mu

taa haw n'adwen na ɔno so taa yeyaa hɔn na ɔpaa hɔn. Okowie ekyir no awofɔ no ye nhyehyee bi de wobesiisii mbɔfra no efi aberwa no a wɔtsetsee noho ma ne dem ntsi wɔmaa mbɔfra no akwankyere na wotuu hɔn fo de wɔntwe hɔnho mfi ho; naaso woye mbɔfra, ɔnnye adze a wobegyaa. Dem nhyehyee yi ansow aba ma ekyir no awofɔ no yee adwen de wonnkotsie hɔn mba no ma wɔakɔ aboano na woyee adwen de wɔbɔtow hɔn abobow ahorow nyinara mu. Ne dem ntsi wɔhyee ase dze nheyhyee yi yee edwuma na nda ebien anaa ebiasa mu no wɔamma mbɔfra no annkɔ aboano. Mber a dem aberwa yi hun de mbɔfra no mmbehaw n'adwen bio mu no, ɔnkɔr efie efie na obisa de hen na hom mba no kɔ, ana ɔwo bi aka no anaa ayemtu yarba ekum no, anaa dan no sor abɔ nodo anaa enyinam atsew abɔ no. Ntsi na ofi abow kor ano a na ɔkor fofor anon a ɔrekeka dem nsem yi kɔpem ber a nkorɔfo no hunn de aberwa no ahyease repaa hɔn mba no mpo fitsi ahyease noara, na dem a eben mfaso na wonyaa de wɔtow hɔn mba no abobow mu na woyee adwen na wogyaa hɔn mba no na wɔma hɔn kwan ma wɔkɔr aboano.

Na Anohoba Mesia (ANN) taa ka de iyi nye Nkɔmhyenyi ne tsebea. Se etuɔtsew n'ano ye dzen a, ɔtse yaw na se etsiafo no ye dzenn a ɔno so ɔtse yaw, osiande se etuɔtsew nnyi ho, ɔnnye adze a nkorɔfo hɔn adwen bɔkɔ Sunsum mu dwumadze nodo. ɔye nokwar de, Nkɔmhyenyi no nnyeyaa na ɔnka kasafi nkkyere nkorɔfo, mpaa ara na ɔbɔ dze ma hɔn. Naaso se atsetsee n'ano ye dzen a, ɔno ɔbɔ mpa ma n'etsiafo no de wɔ hɔn mu no nhyira akra a wɔwo hɔn mu no begye nokwar no edzi.

Ekyir no ɔrekasa afa etuɔtsew ho de ɔye akwanya dze ma mpuntu no Hazrat Khalifatul Masih a ɔtɔdo ebien (NN) kaa de dakor Maulvi Sahib bi a ɔye awensem towfo na ɔkyerew buukuu baa Anohoba Mesia (ANN) ho. Nawab Sahib a ɔwo Rampur yii no de ɔnkyerew Urdu kasafua nkyerease buukuu (dictionary). ɔkaa kyere Anohoba Mesia (ANN) de Nawab Rampur Sahib na Minai nkraataa no wɔ no. ɔkekaa Urdu kasafua buukuu nkyerease a ɔso bɔ mu naaso woennwie na Nawab Sahib woi. Nawab Sahib Rampur dze dem nkraataa no ama me na wɔama me akwankyere de menyee ma onwie pɛye. Anohoba Mesia (ANN) bisaa de etuɔtsew wɔ Rampur bea a etse no, ɔba no den na wɔatwe wɔadwen ma ebeye Bai'at. ɔkaa de obi dze Dur-e-Sameen (Anohoba Mesia (ANN) n'awensem a wɔaka abo mu) maa me na osiande mara so meye awensem towfo ntsi no mekane na m'enyi gyee ho yie osiande muhunn no de Nkɔmhyenyi Krɔnkrɔn (NNN) noho de ahye mu ma. Na ekyir no ɔkaa de Maulvi Sanaullah Sahib baa ho na ɔbekasaa na wɔ dem kasa no mu no ɔkaa kyere hen de Mirza Sahib ye Islam ne tamfo kese na odzi fo de ɔmmfa bu mma Nkɔmhyenyi Krɔnkrɔn (NNN). Mber a metsie dem kasa yin a mohunn de Mirza Sahib beye nokwarfo. Se ɔntse dem a eben hia na ɔwo mu de dem Maulvi Sahib yi botwa akohwi a ɔso tse dem yi. Onyimpa a Nkɔmhyenyi noho de ahye n'akoma mu tse de iyi a wɔ n'awensem mu no wɔada dem ɔdo yi edzi wɔ mu yi, se maulbi bi ka fa dem nyimpa yi ho de ɔye Nkɔmhyenyi Krɔnkrɔn ne tamfo a na ɔye torfo a ekyingye nnyi ho. Na nyimpa a ɔka to nodo de ɔmmfa bu mma Nkɔmhyenyi no ye nokwarfo, se ɔtse dem a hia biara nnyi ho de ɔkasafɔ no beka nsem a ɔnnye nokwar dze ama nekasa no ahoodzen. Na nka ɔwo de ɔka de, ɔwo mu de wɔatonton Nkɔmhyenyi Krɔnkrɔn wɔ Durr-e-Sameen mu, na wɔatonton Otumfo Nyankopɔn no, naaso no nyinara ekyir no ɔye torfo. Se nka ɔkaa no dem yi a nka ɔno beye na nkye ɔnkoye bon biara. Naaso okotsir ɔno, na ogyaa nokwar no nyinara na ɔkaa de dem nyimpa yi ka kasafi fa Nyankopɔn nye Ne Somafɔ hɔn ho. Metsiee ne kasa na hɔn ara mohun de Mirza Sahib ye nokwarfo wɔ ne dawurbo mu na meye krado de meye Bai'at wɔ ne nsa ase. Ntsi nokwar no nye de mpen pii no atamfo no bo mbɔden de wobeye ma etuɔtsew asɔr wɔ nkorɔfo hɔn mu etsia gyedzifo no naaso obedzi nkunyim wɔ ne botaa mu no mbom, dem mbɔdenbo no beye mfaso dze ma gyedzifo no.

Wɔ asem fofor mu no ɔkaa de na anyenkofo bi a ɔgye hon dzi tse Chak Sikandar. Hazrat Khalifatul Masih a otsia ebien (NN) akyerew de na osua dem ber no na ɔkaa yie de na dem enuanom nye Anohoba Mesia (ANN) betsena wɔ engyigye mu na hon enyi gye dem ntsenase no ho yie. Anohoba Mesia (ANN) n'akonta a wofre no Ali Sher ɔye Anohoba Mesia (ANN) ne yer a odzikan no nua) Onam de Anohoba Mesia (ANN) warr Hazrat Ummul-ul-Momineen, onam Nyankopon N'akwankyerɛ ntsi no, ne yer panyin n'ebusaufo hyee ase tsiaa no.

Anohoba Mesia (ANN) ne yer a odzi kan no ye ɔbaa hotsewenyi. Mohunn de ɔdo hen wɔ hen mbɔfra ber mu ara ma na yedwen de ɔdo hen kyen hen na ankasa. (Ntsi dem adwen a ɔwo nkorɔfo hon tsir mu de na nkitsahodzi biara nnyi ono na ne yer no hon ntamu no nnye nokwar) Hazrat Khalifatul Masih a otsi ebien (NN) aka de ber a hen nua baa panyin Ismat wuii no Hazrat Ummu-ul-Momineen kaa kyereɛ hen de ber a Ismat yaree na ne tsebea no mu yee dzen tsede ma akoko ne dze ye ber a woroboku no no, na Ismat wɔ yaw tsebea a no mu ye dzen na oribisa de womfre ne na mma no a na ɔrekyere ne na panyin. Anohoba Mesia (ANN) freɛ no na ber a ɔbaa no ɔdze Ismat ne nsa too ne nsa mu, n'enyiwa gyee na ɔmee na ekyir no owuii. Na ɔye ɔbaa hotseweenyi na ɔdo no kun ne yer a otsia ebien ne mba yie. Na ɔdo Anohoba Mesia (ANN) nara papaapa na ɔma no enyidze na ɔmppe de ɔbetse de obi biara reka biribi bon afa noho. Naaso na ne nuanom mbanyin no nndzi nokwar na wɔbo mbɔdzen de wɔbɛdaadaa nkorɔfo a wɔbɛsera no na wɔka kyere hon de me ye no nua banyin na ne busuanyi na minyim de onkyerr biara na osi fiadze a wɔdze ton adze.

Iyi nye dzaa na wɔka dze fa Anohoba Mesia (ANN) noho de wɔaye dem nhyehyee yi nyinara de ɔdze reye edwuma na ne nkɔmhye dwuma nsem no ye ndaadaasem na wɔtse dem nsem yi a nkorɔfo a hon gyedzi no mu nnye dzen no wɔdaadaa hon do se no nua banyin na ɔreka dem nsem yi a na ɔye nokwar.

Mber bi dem enuanom no yi mekaa honho nsem sesiara no (a wɔtse ben Chak Sikander no) baa Qadian. Kɔpem dem mber no na wonnye Bahishti Maqbara no. Dem asem yi sii wɔ enyim koraa sen dem na dem mber no nkorɔfo a na wɔba Qadian no, de mbre wobohun nhyira mbea a ɔwo Qadian no, na wɔko Masjid Mubarak anaa wɔko na wonye Hazrat Khalifatul Masih a odzikan kotsena anaa wɔko na wɔko na wɔkotsena hen nana no trow mu. Na wɔdwen de onam de dem trow yi ye Anohoba Mesia (ANN) n'egya dze ntsi no, dem bea no so ye nhyira bea.

Wɔ trow no kwan no do no ye bea a ɔbeyee Daaru Zuafa bean a ansaana worisi iyi no na dem asaase no ye Ali Sher Sahib a ɔye Anohoba Mesia (ANN) ne yer a odzika no nua banyin dza. Na ɔye n'enyigye de ɔdze trow kakraba bi besiesie dem bea no. Na ɔtaa wɔ dua tsentsen wɔ ne nsa mu na ɔsan so wɔ abɔdwe nwin pii naaso na ɔye kuw yi ne tsiafo kese na ber nyinara no wɔaye krado de ɔrepe Ahmadiyyanyi a obotum adaadaa no.

Ber bi enuanom no baa Qadian na wɔhyee ase de wɔreko akɔhwe trow no. Wɔ hon mu no , na kor retwetwe ne nan mu a na odzi hon enyim kan na Mirza Ali Sher hunn de wɔye ahɔho a womfir Qadian na ɔdze ndze kese tsiaa mu freɛ hon a na ɔreka de, “nua banyin, mepa wokyeu bra na betise me.” Nyia na odzi enyim no ko no nkyen. Mirza Sher Ali bisaa no de ebenadze ntsi na aba ha? Oyii n'ano de yeatse de Mirza Sahib aka ato gua de ɔye Mesia na Mahdi ne dem ntsi yaaba de yerebohu no osiande ɔda edzi ma hen de ne nsem aɔdze rotu gua no ye nokwar. ɔkaa de ɔyee den na hom aye ma wɔdaadaa hom yi. Ana hom nnhu de dem nyimpa yi etsintsim iyi dze reye edwuma de mbre ɔbeyee a obenya edzidzi sika? ɔye mo nua na minyim ne tsebea yie. Hom ye nkorɔfo a hom nntse Qadian ha, eben nyimdzii na hom wɔ fa ne tsebea ankasa mu. Onnyi kwan de hom ma ho kwan ma ɔdaadaa hom, se onntse dem a hom bebre. Otsiee ne nsem no wie no dem Ahmadiyyanyi yi dze

enyigye koo ne nkyen na obisaa no de onkyia ne nsa mu. Sher Ali Sahib dwenn de ne nsem no enya nsunsuando wo nodo na woetum adaadaa no afa n'ahotsewee ho. Osiande na oye ne su de aber nyinara se arekasa otaa ka, 'SubhanAllah' na 'Alhamdulillah' wo ne nsentow mu. Ne dem ntsi otsenn ne nsa wo enyigye kese mu na odwenn de nde me nsa aka obi a osom bo. Onua a na odzi enyim no suoo ne nsa mu dzen na ohyee ase free no nuanom nkaa no wo ndzen dzendzenn mu de hom mbra ntsem na mowo asem hia bi ka kyere hom.

Hazrat Khalifatul Masih a otsia ebien (NN) akyerew de hen wofa yi dwenn de ne nsem no aka dem nyimpa yi yie ara ma arefre ne nuanom na woaka akyerere hon de dza areka no ye nokwar. Na n'enyi gyee wo n'akoma mu de nde dze m'etuotsew yi enya ne botae. Naaso ber a enuanom anan no bodur ho na wobeyee enum no, dzaa odzikan no hyee ase kaa de yetaa kan wo Kur'an Kronkron na Ahadith mu de bosam bi wo wiadze yi mu naaso yenntum nnhu no da naaso nde, onam adom bi ntsi no, yeehu dem bosam no a arebe mbodzen de obema hen akwankyerere bon no.

Ekyir wo beebi fofor so ose de ekyingye biara nnyi ho de Nyankopon N'adom no tsede esutsen kese na se iyi nsu n'enyi kor fi esutsen no mu a eben ntsewdo naobeba dem esutsen no ne tsebea mu. Oye nyimpa nara ne tsi bon de obotwe noho efi Nyankopon N'adom mfaso noho na woadan n'enyi. Na obi a wosa mu eyi no ba a, nkorofu no, wodwen fa noho de noho nnyi mfaso ntsi no, wadan honho fi ne nkyen.

Na okyereww de na Baba Nanak n'awofu bu no enyim tsia na wotaa ka de odze ose abre hon edwuma na abofra a noho nnyi mfaso yi wawo no ato hon fie. Se nka n'awofu resan aba nkwa mu na wabesere dem mber yi na worohu de, dem abofra no a na wodwen fa noho de noho nnyi mfaso no, nyimpa cha mu mpempem na ne mboree dze enyidze ma no na waye krado de wodze hon nkwa boto ho bema no na wo hon mu ahonya fo a wowo sika apepe ka ho a, obeye hon nwanwa de wobohu iyi. Naaso nkorofu no, onam hon nyimdzi a wonnyi na hon nkwasiasem ntsi no, wodwen de nyia wase mu eyi no noho nnyi mfaso na se wogyee no dzi a eben mfaso na wobonya efi mu. Naaso, Okronkron Nyankopon no, yii nkorofu a wotse dem a oda edzi de honho nnyi mfaso no naaso ber bi ba a nyimpa cha mu mpempem ye krado de wodze hon nkwa bobo afar ama hon.

Woakyerew de iyi nye dem kwan noara a Nyankopon a Okron no afa do asoma Anohoba Mesia (ANN) no wo Qadian. Wo Qadian ahyeese no, na keteke gyinbea nnyi ho, dem ara so na post ofis biara nnyi ho anaa suapon bi a woetu esi ho ama Nyamesom anaa wiadze yi mu adzesua. Na Anohoba Mesia (ANN) no nnyi wiadze yi mu ahonya biara wo bea biara a ebefa no no, adzesua a osua no so na ye n'ahyeese ara. Ne dem ntsi no ber a okaa to gua de oye Mesia no na Mahdi no nkorofu maa hon ndze do de, Nyankopon mpa ngu, dem nyimpa yi nnyim hwee. Obesidan na dem nyimpa yi aye Mahdi no? Ekyir no na nkorofu so taa ka de, obesi dan na obi ofi Nyankopon a Ono na woenyi no no efi dem ekura ketsekete yi mu? Se obi a woenyi no reba a, onoowo de opue fi kurow kese mu tsede Lahore anaa Amritsar nye dzaa okeka ho. Ne dem ntsi nkorofu no hyee se boo gua dze tsia no na dem nkorofu no a, wotsee ne nsem a odze ato gua no, nyaa pe de wobebe Qadian ebohu no no, wobo mbodzen de wobesiw hon kwan de wobebe. Na se woannye hon adwen de wommba a, ono wobema woehyia ahokyrir ahorow na wodze hon befa nsowe na atseetsee ahorow mu. Naaso wo dem akwansidze nyinara mu no, Anohoba Mesia (ANN) no nyaa yikyere fi Otumfo Nyankopon ho de 'Kokobonyi no baa wiadze na wiadze no anngye no annto mu naaso Nyankopon begye n'ato mu na obeda ne nokwar edzi onam nsekyeredze a oye kese na tum wo mu.' Anohoba Mesia (ANN) no nyaa dem yikyere yi ber a na kra kor mpo nngyee no nndzii. Na osanso nyaa yikyere de 'Meye ma wo dawurbo no atserew ako wiadze afananadze nyinara.'

Dem mber no na Anohoba Mesia (ANN) wo somfo bi a wofre no Pira. Na dem nyimpa yi nnyim hwee ara ma odze paraffin ngo fra n'edziban na odzi. Na Anohoba Mesia (ANN) taa soma no wo Batala de onkodzi dem dwuma yi anaa iyi na dakor bi obopure Maulvi Muhammad Hussein Batalwi Sahib a na wonyim no de oye Ahle Hadith fo hon kandzifo. Na wobu no de oye Maulvi a oso na owu nyimdzii so. Na n'edwuma tsitsir ara nye de se obi ba Batala de oreko Qadian a, obehyia hon na woaka akyere hon de dem nyimpa yi, okyere Anohoba Mesia, etsintsim edwuma na oye torfo na eben adze na ebenya de eboko Qadian. Naaso iyi nyinara ekyir no, nkorofu no beba Qadian onam Maulvi Muhammad Hussain ne mbodzenbo de wobesiisii ho.

Wo dem da yi tsitsir woennhu obiara ka Pira ho, dem ntsi okor no ho na okaa de, 'O Pira, onnyi de enye dem nyimpa yi tsenda na ema osee wo gyedzi.' Nyimpa a otse dem yi antse biri biara Maulvi Sahib kaa no ase naaso otsee ase de tsenda a ony e Mirza Sahib tse no nnye mma no. Ber a Maulvi Sahib wie dza opede oka no, oyii Maulvi Sahib ano na okaa de, 'Minnyim hwee na dem nsem a ereka yi menntse ase. Naaso maatse ase de aka de Mirza Sahib ye nyimpa hon. Naaso metse adze kor ase de eko Batala beebiara na eka kyere amanfo de mma hon nko Qadian na ebo mbodzen de ebesiisii nkorofu a wofi mbeambea ahorow a woroko Qadian na eko do bo mbodzen de ebe daadaa hon. Naaso mohun no pefee de Nyankopon ka noho na onnka woho, osiande wo wo mbodzen nyinara ekyir no nyimpa oha na ne mboree ko Qadian ber a wore nantsew naaso obi biara nnyi ho a ohaw noho ba wo nkyen.'

Ne dem ntsi no nkorofu a Nyankopon enyi hon no wohun hon de wosuar na hon ho nnyi mfaso ahyease no na hon a hon enyi da wiadze yi mu ndzamba do no hu hon de nsunsuando biara nnkofi hon mu aba. Dem ara so na wodwen fa Anohoba Mesia (ANN) noho. Naaso nde, Hazrat Khalifatul Masih a otsia ebien (NN) kyerew wo dem mber no, ne Jama'at no atserew ako wiadze n'afananadze nyinara na sesiara, osipi de, onam Nyankopon N'adom atserew mbordo. Se ereka afa Anohoba Mesia (ANN) wo ne Jalsa a otwa tow ho a, nyimpa ahasuon pe na wo bae. Na Hazrat Khalifatul Masih a otsia ebien (NN) kaa de, wo Fida Nyamesemka mu, de nde nyimpa mpem anan na wowo Masjid Aqsa mu a woridzi mu akotsen, na nde wo dem wiadze ne fa mu no, mpo wo dem asordan yi mu, nyimpa a wobor mpem enum anaa esia na woritsie dem Nyamesemka yi.

Hazrat Khalifatul Masih a otsia ebien (NN) kaa de wo Anohoba Mesia (ANN) ne ber do no, nkorofu a wowo India nyinara soere tsiaa no wo kwan biara do naaso wo hon etuotsew nyinara mu no kuw yi too mpon wo India na wiadze yi mu nyinara na wotsintsin Jama'at wo India nye wiadze n'afananadze nyinara. Ara ma nde hen asor tsi reye edwuma wo wiadze yi mu beebiara. Wo England, Amerika, China, Japan, Java, Sumatra, na wo Aburokyir aman nyinara mu no yeetsintsim hen asortsir wo ho na Nyamesemka edwuma roko do wo ho. Wodze dawurbo no ama nkorofu a wowo Ebibimanmu nye nkorofu a wowo Amerika nye Aburokyirmanmu, a na nkaa no wodze biribi bata Nyankopon ho, woregye Islam ato mu wo ekuw ekuw mu a no nyinara nye de Nyankopon dze gyedzi fofor abobo adze onam ne somafo nodo a nkorofu nkaa no ahwer hon.

Ekyir no okaa de Jama'at kuwba a wodze enyidze ma no, Hazrat Sahibzada Abdul Latif Shaheed ye nyimpa kor a obaa Qadian ber a otsee de Anohoba Mesia (ANN) dze ne somasem no ato gua. Ofi fie de orekoye Haj, na ber a otse Anohoba Mesia (ANN) ne nkratow no obaa Qadian na obeyee Bai'at. Ber a oyee Bai'at wie a okor fie no Afghanistan hen hyee de wonsiw n'abo ma onwu wo siantsir de waye Bai'at wo Anohoba Mesia (ANN) ne nsa ase. Nkorofu no hyee no wo kwan ahorow do de obesesa ne gyedzi naaso woanngye annto mu osiande na nokwar no ada edzi ama no. Ewiei no, Ohen no maa wodze no hyee famu na

wosiw n'abo ara ma owui. Wokum no wo dem kwan yaayaa yi do naaso woaka asem biara na odze ne nkwa boɔ afar wo Nyankopon Ne kwan mu. Ansaana wobesiw no abow no aban mu suafo bi baa ne nkyen na okaa kyereɛ no de ebantum ekitsa dem gyedzi no a enya no wo w'akoma mu naaso fa w'ano ka de egyaa mu naaso okaa de onnye adze a obotum edzi akohwi. Ne dem ntsi wokumm no na owui no annkyer biara na Cholera tseww sii kurow no mu na nyimpa mpempem breɛ. (Na besi nde hwe see ogudu retserew)

Dem ara so, ber a nkorɔfo no tsiaa Anohoba Mesia (ANN) no, Nyankopon yii kyereɛ Anohoba Mesia (ANN) ofa no yarba bi a obetsew esi asaase nodo na iyi nye dzaa osii na nyimpa mpempem hwer hon nkwa onam iyi ntsi. Naaso mpo wo ber a yarba no bae no, owo mu de na yarba no kyere ne nokwardzi, naaso, onam n'ehumbobor su ntsi no, obo mpae dzendzennden de dem atowerenkyem yi wobotu akohye mber fofor anaa obeka ekyir. Maulvi Abdul Karim Sahib a na otse Masjid Mubarak ne fa a owo sor kaa de dakor otsee de obi rusu yaayaayaw na wo yaw mu tsede obaa a rowow. Me tsie no yie na mohun de Anohoba Mesia (ANN) robo mpae akyere Nyankopon a orusu na oreka 'O Allah, se nkorɔfo no nyinara wu a, nkorɔfo ben na wobeka a wobegye me edzi.' Iyi so kasa fa Anohoba Mesia (ANN) nokwardzi ho. Dem yarba yi wosomaa de obeye ne nokwardzi ho nsenkyeredze, naaso oka n'akoma ara ma osere ehumbobor. Iyi nye ehumbobor gyinabew, iyi nye Nyankopon Ne Komhyenyi ne ehumbobor gyinabew a owo n'akoma mu.

Ketseankye Nyankopon dze gyedzi yi ho ahooper behye Ahmadiyyanyi biara n'akoma mu. Ketseankye obotow obiara ne nkitsahodzi a onye Nyankopon wo mu. Ketseankye obodua abotar na pintsinn gyina wo obiara no mu. Na ketseankye odze ahodzen a yedze bobo mpae agye adasamba so behyira hen. Ketseankye odze ahodzen a yedze hen ahobrase behye henho do bodwir hen do na woye hen mboa ma yeetum anantsew kwan a odze hen bokɔ ekodur N'enyigye ho. Ketseankye yebeye nkorɔfo a yebedzi akwan a obeye hen mboa ma yeahye Anohoba Mesia (ANN) ne botae ma do. Na ketseankye yebeye nkorɔfo a yebeye dze biara a Anohoba Mesia (ANN) pee de n'ekyirdzifo beye no. Aameen.

Translated by: 1. Mr. Alhassan Kobina Atta-Wenchie  
(Tutor in English Language, Jamiatul Mubashireen, Ghana)  
2. Maulvi Alhassan Bashir Annan Sahib  
(Tutor, Jamiatul Mubashireen, Ghana)  
3. Rasheed Possible Essuman Sahib  
(Final Year Student, Jamiatul Mubashireen, Ghana)  
4. Hafiz Naseem Ahmad Nyame Sahib  
(Composer, Second Year Student, Jamiatul Mubashireen, Ghana)

Downloaded from: [www.jamiatulmubashireen.org](http://www.jamiatulmubashireen.org)  
Contact: [www.jamiatulmubashireen.org/contact-us](http://www.jamiatulmubashireen.org/contact-us)